

նիկում կատարուած փորձերից երևում է, որ Վերօնալը շատ լաւ միջոց է քնի դէմ և գործում է նոյն իսկ այնտեղ, որտեղ միւս դեղերը չեն ներգործում. վերօնալից առաջացած քունը լինում է թեթեւ և բնական քնին շատ մօտ. քնից յետոյ հիւանդն զգում է իրան հանգստացած, կազդուրուած և առոյգ ու հետեւեալ գիշեր քնում է արդէն առանց վերօնալի:

Վերօնալի այդ յատկութիւնը կայանում է նրանում, որ նա թունաւոր չէ և ուրիշ միջոցներից աւելի է ազդում: Իսկ ինչ վերաբերում է հիւանդութիւն հանգստացնող յատկութեան, նա մորֆիից աւելի պակաս է ազդում:

Ներկայ եղողներին ծանօթացնելով վերօնալի, արեան շրջման, սրտի, շնչառութեան և մարսողութեան վրայ ունեցած ազդեցութեան հետ, պ. Շչերբաչկը ծանօթացրեց նաև վերօնալի մարդու կազմուածքի մէջ եղած փոփոխութիւնների և նրա արտաթորութիւնների վրայ կատարած հետազոտութիւնների հետ: Օգտուելով քիմիականութիւնից, պ. Շչերբաչկը այն եզրակացութեան է եկել, որ մարդու կազմուածքի մէջ մտցրած վերօնալը արտադրւում է նրանից բոլորովին անփոփոխ դրութեամբ և շարունակում է ազդել բաւական երկար ժամանակ, 2—3 օր:

* *

Ֆրանսիացի բժիշկ Մուտյէն զեկուցեց Փարիզի բժշկական ճեմարանին երակախտի (артериосклерозъ) բժշկման մասին: Յիշեալ հիւանդութիւնը կայանում է նրանում, որ զարկերակների պատերը փոփոխւում են, կորցնելով իրանց առաձգականութիւնը և դորա հետ էլ արեան ճնշման դէմ անհրաժեշտ դիմադրութիւն ունեցող յատկութիւնը: Մերութեան ժամանակ այդ հիւանդութիւնը սովորական է լինում. այդ հիւանդութեան վտանգը կայանում է նրա մէջ, որ զարկերակը կարող է տրաքուիլ և ուղեղի մէջ արեան հոսում գոյանալ: Մինչև այժմ ոչ մի կանոնաւոր միջոց չկար նորա դէմ: Եթէ Մուտյէի միջոցը հաւանականութիւն զանի բժշկականութեան մէջ, մեծ քայլ առնւած կլինի դէպի առաջ: Մուտյէի միջոցը հետեւեալն է: Խիստ ելեքտրական հոսանքի օգնութեամբ երակների նորաճելութիւնն անցնում է և զարկերակը իր բնական դիրքն ընդունում, որով վտանգաւոր արեանհոսութեան առաջն է առնւում:

ՕՐ. ՆՈՒԱՐԴ ԱՂԱՆԵԱՆՑ